

ԱՎԵՏԻՍ ՀԱՐՈՒԹՅՈՒՆՅԱՆ

Պատմական գիտ. թեկնածու

**ՎԱՆԻ ՆԱՀԱՆԳԻ ՈԱԶՄԱ-ԿՈՒՍԱԿՑԱԿԱՆ ԳՈՐԾԻՉՆԵՐԻ,
ՄՏԱՎՈՐԱԿԱՆՈՒԹՅԱՆ ԵՒ ՀՈԳԵՒՈՐԱԿԱՆՈՒԹՅԱՆ
ՈՉՆՉԱՅՄԱՆ ՀԱՐՑԸ 1914–1915 ԹԹ.¹**

Ա. ՄՏԱՎՈՐԱԿԱՆՈՒԹՅԱՆ ԱՌԱՋԻՆ ԶՈՀԵՐԸ

Առաջին աշխարհամարտի տարիներին Վանի նահանգում ապրում եւ ստեղծագործում էին բազմաթիվ հայ մտավորականներ, հոգեւորականներ եւ ռազմաքաղաքական գործիչներ, որոնք շոշափելի ազդեցություն ունեին Վանի հասարակական-քաղաքական մտքի եւ մշակույթի զարգացման գործում: Հետեւաբար, իթթիհատական կառավարությունը 1914–1915 թթ. ցեղասպանություն իր անարգել քաղաքականությունը Վանի նահանգում կենսագործելու ճանապարհին փորձում էր ոչ միայն հրոճարակ դարձնել հայկական գյուղերը եւ կոտորել տեղի հայ ազգաբնակչությունը, այլեւ վերացնել նաեւ նահանգի աչքի ընկնող հասարակական, ռազմական-կուսակցական, մտավոր եւ հոգեւոր հայ գործիչներին²: «Միություն եւ առաջադիմություն» կուսակցության Ձ-րդ քարտուղար, հայերի ցեղասպանության գլխավոր հանցագործներից մեկի՝ Բեհաեդդին Շաքիրի օրագրից պարզվում է, որ իթթիհատի ղեկավարությունը դեռեւս 1914 թ. սեպտեմբերին արդեն որոշել էր ոչնչացնել հայ երեւելիներին³: Վանի նահանգապետ Թ. Ջեւդեթը ենթադրում էր, որ Վանի կուսակցական գործիչներին եւ մտավորականությունը գլխատելով, նա իր առջեւ կունենար «ոչխարների մի հոտ», որին հեշտությամբ կառաջնորդեր սպանդանոց:

^{1*} Ստացվել է՝ 2.08.2025, գրախոսվել է՝ 2.09.2025: Էլ. հասցե՝ avharutunyan@mail.ru:

² Իբրեւ կարեւոր հարց խնդրին տարբեր առիթներով եւ կողմերից անդրադարձել ենք նաեւ անցյալում՝ այժմ ակնակալելով ավելի մեծ կենտրոնացում եւ տարածում. տե՛ս օր.՝ Վանի նահանգի հայ ռազմական-կուսակցական գործիչների եւ մտավորականության ոչնչացումը. Հիրճի կոտորածը, «Հայկական բանակ ՌԳՀ», 2015, թիվ 1–2 (83–84), էջ 164–175, Վանի նահանգի գավառներում հայկական կոտորածների սկզբնավորման հարցի շուրջ, «Բանբեր հայագիտության», հ. 2, 2022, էջ 39–61 եւ այլն:

³ Տե՛ս Վ. ՓԱՓԱՋԵԱՆ, Համաշխարհային պատերազմը եւ Տարօնի աշխարհը 1914–1915, ա. տ. եւ թ., էջ 23:

Երիտթուրքերի ցեղասպան քաղաքականությանը զոհ գնացած առաջին վանեցի մտավորականների թվում էին՝ բանասեր Հովհաննես Կուլօղլյանը եւ Վանի ռուսական հյուպատոսի թարգման՝ Ղեւոնդ Սրվանձտյանը, որը 1914 թ. պատերազմի նախօրյակին աքսորվեց Փոքր Ասիայի խորքերը, ուր եւ անհետ կորավ:

1914 թ. աշնանը Շատախում Կորտ բեյը դավադրություն կազմակերպեց երիտասարդ դաշակցականներ՝ Հովսեփ Չոլոյանի եւ Սամվել Մեսրոպյանի դեմ, որը սակայն ավարտվեց անհաջողությամբ⁴:

1914 թ. նոյեմբերի սկզբներին Վանի նախկին կուսակալ Հ. Թահսին բեյի դեմ դավադրություն կազմակերպելու ամբաստանությամբ, իթթիհատի էրզրումի ներկայացուցիչ Հիլմի բեյի հրամանով Վանից Կովկաս մեկնելու ճանապարհին՝ Բայազետի մոտ սպանվեց Վանի դաշակցական ներհուն գործիչներից մեկը, Խանասորի արշավանքի մասնակից՝ Թորոս-Գալուստ Ալոյանը⁵: Իշխանությունները կարծում էին, որ Ալոյանը «խիստ կարեւոր գաղտնիքներ ու հրահանգներ կը տանի իր հետ... (խոսքը՝ դաշակցության 1914 թ. էրզրումի 8-րդ ժողովի որոշումները Կովկաս հասցնելու եւ կամավորական շարժումը կասեցնելու մասին էր – Ա. Հ.)»⁶:

1914 թ. վերջերին էրզրումում սպանվեց հմուտ թուրքագետ եւ օրենսգետ, Վանի հայտնի փաստաբան Նշան Գալճյանը⁷:

1914 թ. դեկտեմբերի սկզբներին դավադրություն կազմակերպելու մեղադրանքով ոստիկանություն բերման ենթարկվեց եւ սպանվեց Շատախ գավառի Խումար գյուղի հայրենասեր, խոհեմ եւ քաջ հեղափոխական՝ հայդուկ, հայ-քրդական համերաշխության առաքյալ, Վազգենի՝ Տիգրան Տերոյանի հեղափոխական սան՝ Պետրոսը, որը կառավարության աչքի փուշն էր եւ վայելում էր շրջակա քրդական գյուղերի պատկառանքն ու հարգանքը՝ հաճախ իր քաջությունն ու փորձառությունն օգտագործելով քրդերի պաշտպանության նպատակով: Սպանության հետքը կոծկելու համար, իշխանությունները կեղծ հրացանազարկ կազմակերպեցին

⁴ Տե՛ս «Հայրենիք ամսագիր», Բոստոն, 1924 ապրիլ, թիւ 6, էջ 96:

⁵ Տե՛ս Մ. ԱՐՔ. ՕՐՄԱՆԵԱՆ, Թիւրքահայ աղէտը. պատմական փաստաթուղթեր, Ա., Տեղեկագիր, Ս. էջմիածին, 1919, էջ 32, նաեւ Ա. ԴՕ, Մեծ դէպքերը Վասպուրականում 1914–1915 թվականներին, Երեւան, 1917, էջ 92:

⁶ Վ. ՓԱՓԱՋԵԱՆ, նշ. աշխ., էջ 23:

⁷ Տե՛ս Մ. ԱՐՔ. ՕՐՄԱՆԵԱՆ, Թիւրքահայ աղէտը. պատմական փաստաթուղթեր, Ա., Տեղեկագիր, էջ 36, նաեւ՝ Ա. ԴՕ, նշ. աշխ., էջ 92:

Պետրոսի հայրենի գյուղում, քրդերին հրահրեցին թալանի, ապա կատարվածի մասին տեղեկացրին Շատախի կայմակամին՝ պատճառաբանելով, որ Պետրոսն իբր թե ֆիդայիների ուղեկցությամբ հարձակվել էր պահականոցի վրա եւ սպանվել։ Սակայն շուտով, կատարված պաշտոնական քննությունը բացահայտում է ոստիկանների կազմակերպած դավադրության գաղտնիքը։

Բ. ԻՇԽԱՆԻ ԴԱՎԱԴՐԱԿԱՆ ՍՊԱՆՈՒԹՅՈՒՆԸ

Ժողովրդին վիճակված դաժան ճակատագրի հարվածներից անմասն չմնացին նաեւ իթթիհատականների հետ Վանում «խոհեմությամբ» կարգախոսի հեղինակները, որոնց երիտթուրքերը նույնպես ձերբակալեցին, աքսորեցին եւ ոչնչացրին։

Շատախի դեպքերի առիթով Թ. Զեւդեթը դիմեց փորձված միջոցի՝ ստեղծելով հաշտեցնող մի հանձնաժողով, որին հայերը սիրահոգար համաձայնեցին։ Այդ նպատակով նա ապրիլի 2-ին (ըստ Օ. Մխիթարյանի եւ Հ. Կոսոյանի՝ ապրիլի 3-ին)⁸ իր մոտ է կանչում Վանի դաշնակցական ճանաչված գործիչներ՝ Ա. Վռամյանին ու Արամին եւ ինչպես ինքն է նշում «Իրենց կարծիքը առնեմ շատ կարեւոր խնդրի մը մասին»⁹, այն է՝ Շատախում հայերի ու քրդերի միջեւ ծագած խռովությունը վերացնելու կապակցությամբ։ Նա առաջարկում է, որ Իշխանը՝ դաշնակցության Վանի ռազմական ուժերի կազմակերպիչը, որը նախասահմանադրական շրջանում գործել էր Շատախում եւ համահավասար հեղինակություն էր վայելում ինչպես հայերի եւ թուրքերի, այնպես էլ քրդերի շրջանում, պետք է ուղեւորվեր Շատախ, այնտեղ խաղաղություն հաստատելու, երկրամասը «հանդարտեցնելու» եւ հայերի «ապստամբությամբ» վերջ տալու առաքելությամբ։ Մինչ այդ, Շատախի հայերը վերջնագիր էին ներկայացրել թուրքական իշխանություններին՝ ձերբակալված Հովսեփ Զոլոյանին ազատ արձակելու համար¹⁰։ Ըստ արխիվային փաստաթղթերից մեկի Իշխանի մեկնումը Շատախ՝ «իբրեւ հաշտութեան առաքեալի, ոչ միայն դէպքերու ազդեցութիւնը մեղմած, այլ նաեւ ամենէն անվստահ ու

⁸ Տէս Օ. ՄԽԻԹԱՐԵԱՆ, Վանի հերոսամարտը. հերոսամարտը 1915 ապրիլի 7 – 1915 մայիսի 3, Սոֆիա, 1930, էջ 39, նաեւ՝ Հ. ԿՈՍՈՅԱՆ, Վան-Քաղաքամիջի Ապրիլեան կոիւները, Երևան, 1992, էջ 27։

⁹ Հ. ՊԱՌՊԻ, Սարսափի երկրին մէջ. նահատակ Հայաստան, Կ. Պօլիս, 1919, էջ 81։

¹⁰ Տէս Ա. ԴՕ, նշ. աշխ., էջ 155։

կասկածամիտ մարդն ալ սկսած էր հաշտուիլ այն մտքին հետ, թէ պէտք է ամեն ինչ գոհիլ, բաւարարիլ կառավարութեան փոքրականները, փրկելու համար ազգային գոյութիւնը...»¹¹:

Այս իրադարձութեան մասին մենք հստակ պատկերացում ենք կազմում Շատախի դաշնակցական գործիչ Հովսէփ Խլղաթյանի՝ ՀՅԴ Վասպուրականի կենտրոնական կոմիտեին ուղղված 1915 թ. ապրիլի 5-ի նամակից: Իրականում, ոճրագործ «չմեղ ասիացի» կուսակալը խաբոււմ էր հայերին, քանի որ ընդհարումը ոչ թէ քրդերի, այլ իթթիհատական կառավարութեան հետ էր:

Նահանգապետի առաջարկութիւնը բարեմտաբար ընդունվում է Իշխանի կողմից եւ ստեղծվում է ութ հոգուց բաղկացած խաղաղարար երկկողմ մի մարմին: Իշխանը՝ «դաշնակցական կոմիտեի ռազմիկ դեմքը», խիզախ մի զինվոր, վանեցի երեք թիկնապահներ՝ շատախցի Միհրան Տեր-Մարգարյանի, ազգեստանցիներ՝ Վահան Խոսանյանի եւ Պողոս Թութունջյանի («Քոթոթ» մականվամբ) ուղեկցութեամբ, որոնք քաջ եւ կոփված կռուներ էին եւ դեմ էին կուսակցութեան պարտադրած այդ առաքելութեանն ու զիջումների քաղաքականութեանը, որոշում է մեկնել Շատախ:

Սկզբից եւեթ նշենք, որ Իշխանի Շատախ մեկնելու որոշումն արդեն իսկ սխալ էր: Ժամանակի հայ հասարակական-քաղաքական ընդդիմադիր շրջանները, որոնք հիասթափված էին Իշխանի եւ Ա. Վռամյանի վարած «խոհեմութեան» քաղաքականութիւնից, անընդունելի էին համարում Իշխանի կարճամտութիւնը, քանի որ նրանք առանց երկմտելու «կը մեկնեն միաժամ հանդարտեցնելու եւ կռիւն ընդհատելու...» եւ «...թռան ձիուն կոնակը եւ յեղափոխական Շատախի կրակը մարելու գացին...»¹²:

Մ. Ավետյանը կարծում է, որ «...յեղափոխութեան պատասխանատու ղեկավարը՝ փոխանակ ինքը ստանձնելու հայկական գոյամարտը, զայն մարելու կ'երթար Շատախ, ուր հայ ժողովուրդը իր գոյութեան պայքարը կը մղէր»¹³: ՀՅԴ ղեկավարութիւնը եւ անձամբ Իշխանը եւս քաջ գիտակցում էին, որ իրենց քայլը հայկական պատվիրակութեանն ստույգ առաջնորդում էր

¹¹ ՀԱԱ, ֆ.450, ց.1, գ.45, թ.44:

¹² Ե. Ա. Բ. Ք. Ն. Յ. Գեղամեան, Հայերի ազատագրական շարժումները XX դարում կամ Հայկական հարցի եօթներորդ շրջանը (մասն երկրորդ), XX դ., Բագու, 1917, էջ 614, 616:

¹³ Մ. Ա. Վ. Տ. Ն. Յ., Հայ ազատագրական ազգային հիմնամեայ (1870–1920) յուշամատեն եւ գոր. Անդրանիկ. վերլուծական հայեցողութեամբ եւ վաւերական տուեալներով, Փարիզ, 1954, էջ 143:

մահվան, բայց եւ այնպէս «անոնք տակաւին հաստատ կը մնային Ճետեթի կամայականութիւնները գոհացնելու իրենց ուղիին վրայ...»¹⁴:

Իշխանի Շատախ մեկնելու պատրաստակամությունը քննադատության են ենթարկել հենց դաշնակցական գործիչները: Հ. Կոսոյանը, խոսելով այդ որոշման մասին, գրում է. «Իշխանի յանկարծական մեկնումը չսպասուած անակնկալ մըն էր թէ՛ ժողովրդի եւ թէ՛ բոլոր երիտասարդութեան համար՝ այսպիսի մէկ տագնապալի բոլակին: Ինչ ալ որ լինի մեծ սխալ մըն էր Իշխանի Շատախ դրկուիլը, այս էր ամբողջ ժողովրդեան կարծիքը, որ Իշխանի անձնատուրութեան եւ ներկայութեան մէջ վստահորեն ցեղին կորովի, ոգորումի եւ յաղթանակի ոյժը կը տեսնէր խտացած»¹⁵:

Իշխանի երեք թիկնապահները եւս գիտակցում էին Թ. Ջեղեթի խաբէությունը եւ հասկանում էին, որ իրենք կամավոր զոհաբերության էին մեկնում միայն եւ միայն այն բանի համար, որ իրենց պարտքը կատարեն կուսակցության առջեւ: Մեկնելու սխալականությունն է փաստում հատկապէս Վահան Խռանյանն, որ մահից առաջ իր կուսակից ընկերներին պատգամում է. «Այս անգամ ալ մեզի խաբեցին: Մենք կերթանք մեռնելու իզո՛ւր տեղ, բայց դուք այլեւս չխաբուիք»¹⁶:

Ինչպէս տեսնում ենք, շարքային դաշնակցականների պատկերացումներն ավելի իրատեսական էին: Նրանք ավելի խորն էին ըմբռնում թուրքական կառավարության ու Վանի կուսակալ Ջեղեթի նենգ քաղաքականության էությունը, քան թե իրենց ղեկավարները:

Որպէս խաղաղարար խառն հանձնաժողովի անդամ երեք ոստիկանների ուղեկցությամբ Իշխանի հետ Շատախ է մեկնում նաեւ Վանի ոստիկանապետ Վեֆիկ Բեյը¹⁷, որն իր զբաղեցրած դիրքի համեմատ «ավելի մարդկային էր, վստահելի, ինչ որ իրենից կախված լինէր, չէր խնայի»¹⁸:

Նախապէս որոշվել էր, որ հանձնախումբը գիշերելու էր հայկական Կարմիրքար (Կիզիլդաշ) գյուղում¹⁹, բայց ոստիկանապետի պնդմամբ հաշտարար հանձնաժողովի անդամները՝ «խաղաղութեան առաքելալնե-

¹⁴ Վ. ԹԱՇՃԵԱՆ, Իշխանը. Վանա Իշխանի կեանքն ու գործունեութիւնը, Երեւան, 1994, էջ 181:

¹⁵ Հ. ԿՈՍՈՅԱՆ, նշ. աշխ., էջ 27:

¹⁶ Ա. ԴՕ, նշ. աշխ., էջ 155, նաեւ՝ Օ. ՄԽԻԹԱՐԵԱՆ, նշ. աշխ., էջ 40, նաեւ՝ Հ. ԱԻ. ՔՆՅՅ. ՀԱՃԵԱՆ, Հայոց տաժանքի ճամբաներով, հտ. Ա., Թեհրան, 1965, էջ 376:

¹⁷ ՏԷՍ Ա. ԴՕ, նշ. աշխ., էջ 155:

¹⁸ Վ. ՍՈՒԱԽՅԱՆ, Թեժ մարտերը Վանի Քաղաքամիջում, Երեւան, 2000, էջ 13:

¹⁹ ՏԷՍ Оборона Вана, 7 апреля — 4 мая 1915 г., М., 1917, էջ 23:

րը», ապրիլի 3-ի երեկոյան կանգ են առնում Շատախի կես ճանապարհին, Հայոց ձոր գետի հարթավայրում՝ Հայոց ձոր գավառի Հիրճ գյուղում, որն ուներ 30 տուն հայ եւ 40 տուն քուրդ խառը բնակչություն²⁰։ Իշխանն անձամբ է որոշում գիշերել Հիրճում, քանի որ նա այդ գյուղի տասնորդի տուրքը վերցրել էր կապալով եւ հաճախ էր լինում այնտեղ, եւ որ Հիրճում էր ապրում իր «բարեկամ» տեղացի քուրդ մեծահարուստ Քեարիմ օղլի Ռաշիդը։ Մինչ Իշխանը եւ նրա ընկերները «հյուրընկալ» քրդին չվիրավորելու համար զենքերը վայր էին դրել եւ վայելում էին Ռաշիդ աղայի ու ոստիկանապետի հյուրասիրությունը²¹, անակնկալ հյուրասենյակ են մտնում Զեդեթի հրամանով Վանից ուղարկված 12 զինված չերքեզների աւազակախումբը, որոնք տեղն ու տեղը գնդակահարում են Իշխանին ու նրա երեք զինակիցներին։ Ապա սպանվածներին կողոպտելուց, զենքերն ու ձիերը բռնագրավելուց հետո, դիակները հողոտում են ու նետում գյուղի հորերից մեկը²²։ Այդ դեպքի մասին 1905 թ. Վանի Հայոց ձորի Կեմ գյուղում ծնված ականատես Սիրակ Մանասյանը վկայում է. «...լուր հասավ, որ հասարակական-ֆաղափական գործիչ պարոն Իշխանին մեր հարեւան Հիրճ գյուղում սպանել են։ Այդ այն ժամանակն էր, երբ թուրքերը Զեդեթ փաշայի միջոցով մեր մեծերին կանչում եւ գլուխներն ուտում էին։ Այդ ահուկ օրերին պր. Իշխանին հանկարծակի սպանում են եւ գցում են հորը։ Զբաղաւարվելով դրանով, նրա երկու երեխաներին եւս ողջ-ողջ գցում են հորը։ Մենք, որ այդ լսեցինք, հայրենակիցներով իրար անցանք։ Մենք սկսեցինք պատրաստվել թուրքերի հարձակմանը»²³։

Այդ մասին է վկայակոչում նաեւ էրզրումի կայզերական հյուպատոս Շոյբների՝ Կ. Պոլսի Գերմանիայի դեսպանատուն ուղարկած 1915 թ. ապրիլի 26-ի հեռագիրը, որտեղ նշվում է, որ «Վանից հենց նոր ստացված ապրիլի 19-ի (նոր տոմարով - Ա. Հ.) մասնավոր լուրերը վկայում են այն մա-

²⁰ Տէս Օ. ՄԽԻԹԱՐԵԱՆ, նշ. աշխ., էջ 42։

²¹ Փ. Թերլեմեզյանը վկայում է, որ Ռաշիդ աղայի տանը թուրքերը թոնրատանն էին հյուրընկալվել, իսկ հայերը՝ մատանում։ «Փոլիս կոմիտեներ» իր զենքերը եւ հագուստները հանած մի քանի անգամ մտնում է հայ տղաների մոտ՝ ասելու, որ իրենք արդեն զենքերից ազատված ուտում ու հանգստանում են եւ խորհուրդ է տալիս, որ նրանք էլ ուտեն ու հանգստանան՝ ավելացնելով. «Շուտ պառկեք, որ շուտ ելնեք»։ Տէս Փ. ԹԵՐԼԵՄԵԶԵԱՆ, Կյանքիս հուշերը, Երեւան, 2017, էջ 331։

²² Հատ Հանուի Պարպիի դիակները նետել են Վանա լիճը։ Տէս Հ. ՊԱՌՊԻ, նշ. աշխ., էջ 81։

²³ Վ. ՍԱԳՂՅԱՆ, Հայոց ցեղասպանություն. ականատես վերապրողների վկայություններ, Երեւան, 2011, էջ 101, նաեւ նույնի՝ Հայոց ցեղասպանությունը եւ պատմական հիշողությունը, Երեւան, 2003, էջ 42–43։

սին, որ մինչև խոռովության բռնկվելը կառավարությունը ձերբակալել էր հայ երեսելիներին, որոնցից հայ երեսելի Իշխանը եւ երեւ այլ հայեր ոստիկանական հսկողության ներքո տեղափոխելիս մորթվել են»²⁴:

Ենթադրելի է, որ Իշխանի սպանության հարցում Թ. Զեւզեթը ոչ ոքի չէր վստահել եւ որոշումը կայացրել էր մենակ: Այդ մասին է փաստում ոստիկանապետ Վեֆիկ Բեյի կնոջ հետ կապված մի վկայություն, որ պահպանվել է Կալիպսե Սոլախյանի հուշերում. «Մի ֆանի ժամից տեղ է հասնում ոստիկանապետը (խոսքը՝ Վեֆիկ Բեյի մասին է.— Ա. Հ.)՝ ուղեկցող ոստիկաններով, շվարած ետ դառնում դեպքի վայրից: Ասում են ոստիկանապետը անտեղյակ է եղել այդ դավադրությանը: Այդ լուրը հաջորդ օրը՝ ապրիլի 4-ին մեզ հայտնեց Հայկավանի մեր տանն ապրող զինվորականի կինը, երբ մայրս գնացել էր տան վարձը ստանալու: ...27-ամյա քրոնին, որ երկու անշափահաս երեխաների մայր էր, մտերիմ էր Վեֆիկ Բեյի կնոջ հետ... Մեր տնվորի պատմելով, Վեֆիկի կինը ասել է. «Վեֆիկ Բեյը այդ դավադրությունից (Իշխանի դեմ) տեղեկություն չի ունեցել, գնացել է ի պաշտոնե եւ հանդիպել է արդեն սպանված ճանապարհակիցներին (°)»: Դա խայտառակություն է, ասել է զինվորականի կինը, մեծ մարդն այդպես նենգաբար տված խոսքը չպետք է դրժեր, խաբեությամբ է ուզում փաշայության տիտղոս ձեռք բերել (խոսքը՝ Թ. Զեւզեթի մասին է.— Ա. Հ.)»²⁵:

Հաջորդ օրը Հովսեփ Խլղաթյանը կատարված ոճրագործության մանրամասները փոխանցում է դաշնակցության Վասպուրականի կենտրոնական կոմիտեի անդամներին²⁶: Նամակում մասնավորապես նշում է, որ «Իշխանն իր երեւ ընկերներով հասած է Հիրե գիւղը, ուրբաթ օրը, ու զգիշերին եւ նախ ընտրուած է իջեւանիլ իր վաղեմի բարեկամ Քեարիմ օղլի Ռաշիդի տունը: Մինչ Իշխանն ու ընկերները գէնֆերը վար դրած վայելած են Ռաշիդի ու ոստիկանապետի կեղծատր հիւրասիրութիւնը, ֆաղաֆէն, Զէվդէթի յատուկ կարգադրութեամբ, ճամբայ ելած եւ Իշխանն ու ընկերները դաւադրօրէն սպանելու տմարդի պաշտօնն ստանձնող 12 զինուած շէթաները՝ վրայ կը հասնին եւ սենեակը մտնելով յանկարծական կրակի կը բռնեն եւ տեղն ու տեղը կանշնացնեն Իշխանն ու երեւ ընկերները: Իշխան հագիւ ժամանակ կունե-

²⁴ Գերմանիան եւ Հայաստանը 1914–1918. գիվանագիտական փաստաթղթերի ժողովածու, հրատարակությունը եւ ներածությունը՝ ղոկտոր Յոհաննես Լեփսիուսի, Թարգմանությունը՝ գերմաներենից՝ Վալենտինա Մինալյանի, հտ. 1, Երեւան, 2006, էջ 153:

²⁵ Կ. ՍՈՒԱԽՅԱՆ, նշ. աշխ., էջ 14:

²⁶ Տէս ՀԱԱ, ֆ. 450, ց. 1, գ. 45, թ. 54:

նայ ձեռքը ատրճանակին տանելու... Ձորս ընկերներն ալ կը նահատակուին միեւնոյն վայրկեանին... Իշխանի եւ երեք ընկերներու դիակները կողոպտելէ, զէնքերը խլելէ եւ ձիերը գրաւելէ ետք, մարմինները յօշոտած են եւ ձգած նոյն գիւղի հորերէն մէկուն մէջ»²⁷:

Հ. Խլղաթյանի նամակը կասկածանքի տեղիք չէր թողնում, որ Իշխանն ու նրա ընկերներն իրոք սպանվել էին, եւ որ Թ. Զեւդեթը Իշխանին վերացնելուց հետո մեծ ուժեր է կենտրոնացնում Վանի հայությանը 24 ժամվա ընթացքում սրի քաշելու համար: Այդ է հաստատում նաեւ Ա.-Դոն, երբ գնահատելով իր բնույթով արեւելյան այդ անօրինակ դավադրութիւնը նշում է. «Դրանով սկիզբն է դրում Զէւդէթի արիւնոտ ծրագրին, դրանով սկսում է անօրինակ ռինների շարքը, որոնք գալիս են կազմելու հայ ժողովրդի տարեգրութեան սոսկալի էջը»²⁸:

Սակայն Հ. Խլղաթյանին լսող չկար, քանի որ դաշնակցական ղեկավարները դեռեւս հույսեր էին կապում ռճրագործ Թ. Զեւդեթի հետ, որն իր նենգ թակարդով նպատակ ուներ վերջնականապէս խորտակել վանեցու դիմադրական ոգին: Սակայն, ինչպէս «Ճակատամարտ» պարբերականն է պատասխանում «յաջողեցաւ թակարդը, բայց չիրականացաւ նպատակը...»²⁹:

Իշխանի եղեռնական սպանութիւնը խորապէս ցնցեց Վասպուրականի ողջ հայությանը: Սպանութիւնից մեծապէս ազդված Հ. Մանուկյանն շտապում է գրել, որ «...այնքան անակնկալօրէն ու այնքան վայրկեանական կատարուած Իշխանի եղեռնական մահը, ստեղծեց պահանջուած մօմէնտը: Ամենքը, յեղափոխականն ու պահպանողականը, ծերն ու երիտասարդը, կուսակցականն ու չէզոքը, կիմն ու երախան, բոլորը, բոլորը մէկ վայրկեանի մէջ, հոգեբանական զսպանակի մը ուժով զգացին, որ զէն ի ձեռին պաշտպանուելէ զատ, չկայ ուրիշ միջոց: Կեանքի նամբաները գոցուեցան, եւ մէկ նամբայ միայն մնաց. բոլորը եկան ու կանգնեցան այդ փրկարար նամբուն վրայ: Ժողովներու, նաոներու, ֆուէներու պէտք չեղաւ. այդ համոզումը գոյացաւ մէկ վայրկեանի մէջ, տարերային թափով ու բնագրական մղումով մը: Իշխանի մահը եղաւ շաղկապող, զօդող օղակը հասարակական բոլոր ուժերու, հանրային բոլոր կարողութիւններու, անիկա *accumulateur* մը եղաւ եւ մեր դիմադրական ուժի բոլոր ակերը բացաւ մէկ կէտի վրայ: Իշխանի մահը եղաւ երկաթեայ այն հա-

²⁷ Օ. Մ Խ Թ Ա Ր Ե Ա Ն, նշ. աշխ., էջ 42–43:

²⁸ Ա.-Դո, նշ. աշխ., էջ 156:

²⁹ «Ճակատամարտ», Կ. Պոլիս, 1921 թ. ապրիլի 24, թիւ 740–2561:

րուածը, որ դարբնեց բոլոր կարողութիւնները եւ անոնցմէ ստեղծեց կամք մը հզօր ու ապառաժեայ՝ Յեղին գոյութիւնը պահելու եւ յաղթանակելու անյող-դողդ որոշումով մը: Մոռացութեան արուեստն արուեստն էր, որ մանր հողերը, կորան պզտիկութիւնները, մասնատու տեղի տուաւ ընդհանուրին, անհատականը հանրականին: Լինումն ու յուսահատութիւնը չփայտեց եւ փայտեց Լուսինայի թափահարեց իր թելերը Վասպուրականի երիտասարդութեան վրայ»³⁰:

Իսկ Տ. Թեոդիկը նկատում է, որ Իշխանի սպանութիւնը «առաջին արիւնն էր այս, որ կը թափուէր Վասպուրականի մէջ...»³¹ եւ այն էլ մի մարդու, որի նմանները քիչ են անգամ «ազգերու հերոսացանկին մէջ»³²:

Գ. ՀԻՐՃԻ ԿՈՏՈՐԱԾԸ

Ա.Վառայանի ձեռքակալութիւնը, աքսորը եւ սպանութիւնը: Վանի ղեկավար գործիչների ոչնչացման ծրագրի առաջին մասն իրագործելուց հետո, Թ. Զեղեթն անցնում է ցեղասպանութեան քաղաքականութեան հաջորդ կետի գործադրմանը: Ապրիլի 4-ին Հիրճում իշխանութիւններն այդ նույն «բարեկամ» քրդի տանն են հավաքում գյուղի 46 հայ տղամարդկանց, բնաջնջում նրանց, ապա դիակները լցնում հորերը, իսկ կանանց կողոպտում, տանջում եւ գյուղից դուրս տանելով սպանում: Միայն մեկին է հաջողվում ազատվել նախճիրից: Այդ մասին Հովսեփ Խլաթյանը հիշում է. «Հիրճ գիւղի հայերէն միայն մէկը ազատած է: Մնացեալները գիւղէն դուրս չեն կրնար գալ, բանտարկուած են եւ բնական է, որ պիտի կոտորուին: ...Կը կարծեմ, որ հերթը մեզի հասած է... Նորդուզէն եւ Խոջաբէն հազարաւոր հեծեալ եւ հետեակ զինուած բիրդեր արդէն իսկ բռնած են Հայոց-Ձորի հայ գիւղերու բոլոր ճամբաները: Քրդական զունդերու առաջնորդն է Գրաւցի Շաֆի աղայի տղան Լէզգին: Կը պատրաստուիմ դիմադրութեան, բայց թշնամու գերազանց ուժերու դէմ որեւէ յաջողութիւն անյուսալի է: Ոչ միայն զէնքի եւ ռազմամթերքի, այլեւ կոռուղ ուժերու սուր կարիք ունինք... Մնաք բարով «Համբոյրներով» Յովսէփ Խլաթեան» 4 ապրիլի, Հայոց ձոր, 1915»³³: Միա-

³⁰ Գ. ԼԱԶԵԱՆ, *Յեղափոխական դէմքեր (մտաւորականներ, հայդուկներ)*, Գահիրե, 1945, էջ 387–388, նաեւ՝ Հ. ԱՃԷՄԵԱՆ, *Սգապսակ Իշխանի, Թիֆլիս, 1916*, էջ 22:

³¹ ԹԷՈԴԻԿ, *Յուշարձան նահատակ մտաւորականութեան, Երեւան, 1985*, էջ 72:

³² Հ. ԵՐԱՄԵԱՆ, *Վան-Վասպուրական, «Հայրենիք ամսագիր», Բոստոն, 1925*, թիւ 8, էջ 120:

³³ Օ. ՄԽԻԹԱՐԵԱՆ, *Նշ. աշխ, էջ 43*, նաեւ՝ Ա. ՎԷՐ. ԿԵՐԿԻՋԵԱՆ, *Վան-Վասպուրականի հերոսամարտը. 1915 ապրիլի 7 – 1915 մայիսի 7*, յոյս եւ լոյս, Պէյրութ, 1965, էջ 88:

Ժամանակ, նա լուր է ուղարկում Վան եւ հայտնում, որ Վանի հայերի կոտորածը նախատեսվում էր 1915 թ. ապրիլի 6-ին³⁴:

Ապրիլի 4-ի գիշերը աննկարագրելի մի եռուզեռ էր Վանի Քաղաքամիջի պաշտոնատան մեջ, որտեղ Բիրհանեդդին բեյը մինչեւ լուսաբաց զբաղված էր զանազան կարգադրություններով: «Վանա Իշխան»-ին սպանելուց եւ Փոլադ բեյի սուրհանդակների միջոցով սպանության լուրը ստանալուց հետո, Թ. Զեւդեթը 1915 թ. ապրիլի 4-ին՝ շաբաթ օրը, առավոտյան ժամը 10-ին, դավադիր մտադրությամբ իր տուն՝ խորհրդակցության է հրավիրում Վանի հասարակական-քաղաքական ճանաչված դեմքերից՝ Ա. Վռամյանին, Արամին, Ա. Թերզիբաշյանին ու Գ. Ճիտեջյանին՝ «որպես զի...իրենց կարծիքը առնեմ շատ կարեւոր խնդրի մը մասին»³⁵:

Այս անգամ Զեւդեթի բուն նպատակը Ա. Վռամյանին եւ Արամին ձերբակալելն էր, որպեսզի նրանք միմյանցից անտեղյակ ներկայանային ու ընկներին իր ծուղակը: Արամը բնակվում էր Վանի Արարք թաղամասում, իսկ Ա. Վռամյանը՝ Խաչ-փողոցում: Այդ նպատակով Զեւդեթը նրանց իր մոտ է հրավիրում՝ Ա. Վռամյանին Խաչ փողոցի, իսկ Արամին՝ Արարքի ոստիկանության միջոցով³⁶: Դավադրությունը քողարկելու նպատակով Զեւդեթը նրանց հետ իր մոտ է կանչում նաեւ Ա. Թերզիբաշյանին եւ Գ. Ճիտեջյանին: Նահանգապետի ծանուցումը Ա. Վռամյանին է հանձնվում այն ժամանակ, երբ նա Եզնիկ եւ Դանիել վարդապետների հետ կառք նստած իջնում էր քաղաք՝ Արամի հետ կուսակալին հանդիպելու նպատակով³⁷:

Դանիել վարդապետի խորհրդով Ա. Վռամյանը Զեւդեթի մոտ է մեկնում մենակ³⁸: Նախքան կուսակալին հանդիպելը, նա իր մոտ եղած նամակները, փաստաթղթերը, հաշիվները եւ 30 օսմանյան ոսկին թողնում է դպրոցում՝ իր գրասեղանի գզրոցում: Մեկնելուց առաջ նա մի երկտող է գրում Արամին հետեւյալ բովանդակությամբ. «Առամ, կուսակալը ինձ կանչեց, ես գնում եմ, եթէ ֆեզ էլ կանչի, մի՛ գար: Ես կերթամ կոր, դուն կե-

³⁴ Տէս Մ. ԱՐՔ. ՕՐՄԱՆԵԱՆ, Թիրքահայ աղէտը. պատմական փաստաթուղթեր, Ա., Տեղեկագիր, էջ 19:

³⁵ Հ. ՊԱՌՊԻ, նշ. աշխ., էջ 81:

³⁶ Տէս Օ. ՄԽԻԹԱՐԵԱՆ, նշ. աշխ., էջ 40:

³⁷ Տէս Հ. ԿՈՍՈՅԵԱՆ, նշ. աշխ., էջ 28:

³⁸ Տէս Ճ. ԴԵՐԿՈՄՍ ՊՐԱՅՍ, Անգղիական կառավարութեան կապոյտ գիրքը Հայկական Մեծ Եղեռնի մասին (1915–1916), Կ. Պոլիս, 1919, էջ 58:

ցի՛ր»³⁹, «եւրբ դու էլ հրաւիրուես Զեւդէթի մօտ, չգաս մինչեւ իմ վերադարձս»⁴⁰: Այս ամենը վկայում էր, այն մասին, որ Ա. Վռամյանն ամբողջութեամբ զգում էր սպառնացող վտանգը: Հ. Կոստյանն այն համոզմունքն է հայտնում, որ եթե անգամ Ա. Վռամյանն իմանար նաեւ Իշխանի սոսկալի մահը, որի մասին նա տեղյակ չէր, այնուամենայնիվ առանց վարանելու կգնար «...մտրակելու համար Զէվտէթի նամարդ գործը, պիտի անապարէր ցասում կտրած՝ խարանելու համար ժողովրդի դահնապետի ճակատը»⁴¹:

Ա. Վռամյանը կառքով մեկնում է նահանգապետարան, որտեղ նա դավադրաբար ձերբակալվում է ու այլեւս հետ չի վերադառնում: Նրան տեղեկացվում է օսմանյան կենտրոնական կառավարութեան պահանջը՝ անհապաղ Կ. Պոլիս տեղափոխելու մասին: Ա. Վռամյանը բողոքարկում է որոշումը եւ մատնացույց անում պատգամավորական իր անձեռնմխելիութունը, որը սակայն «ֆաղափար կերպով վար կը դրուի»⁴²: Դեպքերի անմիջական ականատես Միհրան Ղազարյանը փորձում է բացատրել, որ Ա. Վռամյանը հավատալով իրեն «եղբայրացած» էնվերի երդմանն ու հեռագրին, ինչպես նաեւ ցանկանալով Վանի նահանգը գերծ պահել արյունահեղութուններից, նախընտրել էր մեկնել Կ. Պոլիս⁴³:

Թ. Զեւդէթի հրամանով Ա. Վռամյանն ապրիլի 5-ին 50 ոստիկանի ուղեկցութեամբ Վանի Ավանց նավահանգստից՝ նավով տեղափոխվում է Դատվան, իսկ այնտեղից էլ Բաղեշ-Դիարբեքիր: Ա. Վռամյանին ազատ արձակելու հարցը քննարկվում է 1915 թ. ապրիլի 6/19-ին Գ. Սպորդոնիի եւ Թ. Զեւդէթի հանդիպման ժամանակ: Սակայն կուսակալը պատճառաբանում է, որ «հայցը եւ հրահանգը Պոլսից է»⁴⁴:

Ըստ գերմանական դիվանագիտական փաստաթղթերի եւ մասնավորապես Գերմանիայի արտգործնախարար Յիմերմանի 1915 թ. հունիսի 28-ի հաղորդագրութեան, նախապես որոշված էր Ա. Վռամյանին՝ որպես օսմանյան խորհրդարանի պատգամավոր տեղափոխել Կ. Պոլիս՝ այնտեղ մահապատժի ենթարկելու համար: Նրան փրկելու ակնկալիքով

³⁹ Թէոֆիլ, Յուշարձան նահատակ մտաւորականութեան, Երեւան, 1985, էջ 72:

⁴⁰ Հ. Ա. Բ. ՔԶՆՑ. ՀԱՃԵԱՆ, նշ. աշխ., էջ 376:

⁴¹ Հ. ԿՈՍՏՅԱՆ, նշ. աշխ., էջ 28:

⁴² ՀԵՐՈՍԱՊԱՏՈՒՄ ՄԵՍ ԵՂԵՌՆԻ, Պելրութ, 1978, էջ 54:

⁴³ ՏԷՄ Ի. ԱՎԱԳՅԱՆ, 1915 թ. բիթլիսյան ողբերգութիւն. Միհրան Ղազարյանի հուշապատումը, Գյումրի, 2008, էջ 10–11:

⁴⁴ 1915-ի ինքնապաշտպանական կռիւները, Նոր Զուղա, 2015, էջ 9:

Յ. Լեփսիուսը դիմում է Գերմանիայի արտգործնախարար Յիմերմանին, իսկ վերջինս էլ Կ. Պոլսի գերմանական դեսպան Հ. Ֆոն Վանգենհայմին⁴⁵։ Իր հերթին օսմանյան պետական պաշտոնյա Միհրան Պոյաճյանը, որը Ն. Հոֆի հետ այդ ժամանակ գտնվում էր Բիթլիսում, Ա. Վռամյանին ազատ արձակելու համար դիմում է նահանգապետ Մուսթաֆա Աբդուլ-հալիբ Ռենդային։ Սակայն վերջինս պատասխանում է, որ «հիմա վրէժի ժամանակն է»⁴⁶։

Պատմագրության մեջ առ այսօր հստակեցված չեն Ա. Վռամյանի սպանության մանրամասները։ Ըստ Մ. արք. Օրմանյանի վկայության՝ Ա. Վռամյանը Բիթլիսում Բոհտանսու (Ջերմ, կամ Արեւելյան Տիգրիս) գետի կամրջի վրա շարշարանքների ենթարկվելուց հետո սպանվել է, իսկ դիակն էլ նետվել է գետը (ըստ Հ. Պարպիի՝ Վանա լիճը)⁴⁷։ Ըստ բերդաշենցի ականատես-վերապրող Մանվել Մարությանի վկայության նավավարները ծանր երկաթ են կապել Ա. Վռամյանի վզից եւ նրան խեղդամահ արել Վանա ծովում⁴⁸։ Արժանահավատ մեկ այլ տեղեկության համաձայն Ա. Վռամյանին սպանել էին հունիսի 22-ին՝ Բիթլիս-Դիարբեքիր ճանապարհին⁴⁹։ Արժեքավոր տեղեկություն է հաղորդում նաեւ Բիթլիս նահանգի իշխան գավառի Շամիրամ գյուղի բնակիչ՝ Հովակիմ Շահբազյանն իր «Դատվան» անտիպ աշխատության մեջ (էջ 100–101)։ Նա հիշում է, որ «մարտի վերջին Դատվան գյուղի ֆահանա տեւ Արմենակը, որը հայ ազատագրական շարժման կողմնակից եւ ակտիվ մասնակից էր, գիշերը սուրհանդակ էր ուղարկել եւ հայտնել, որ Վանում Զեյդեք փաշան Վռամյանին կանչել էր խորհրդակցելու համար եւ բանտարկել էր ու մոտորնի նավակով ուղարկել ուշ երեկոյան ժամանակ։ Եւ նրան տեսա. 20-ից ավելի պահակախմբի հսկողությամբ նրան տարան կռտուն։ Երեկոյան ստույգ իմացամբ, որ նա կմնա այստեղ մինչեւ Բիթլիսից զորք կուղարկեն ապահով տեղափոխելու հա-

⁴⁵ Տե՛ս Գերմանիան եւ Հայաստանը 1914–1918. դիվանագիտական փաստաթղթերի ժողովածու, հրատարակությունը եւ ներածությունը՝ դոկտոր Յոհաննես Լեփսիուսի, թարգմանությունը գերմաներենից՝ Վալենտինա Մինայանի, հատոր 1, էջ 207։

⁴⁶ ԶԱԻՆ ԱՐՔ., Պատրիարքական յուշերս. վաւերագիրներ եւ վկայություններ, Գահիրէ, 1947, էջ 92։

⁴⁷ Տե՛ս Մ. ԱՐՔ. ՕՐՄԱՆՅԱՆ, նշ. աշխ., էջ 19։

⁴⁸ Տե՛ս Վ. ՍՎԱՋԼՅԱՆ, նշ. աշխ., էջ 133։

⁴⁹ Տե՛ս Оборона Вана, 7 апреля – 4 мая 1915 г., էջ 26, նաեւ Տրապիզոնի թեմին վիճակաւոր Յովհաննէս արք. Նազլեանի յուշերը Մերձաւոր Արեւելքի 1914–1928 շրջանի քաղաքական-կրօնական դէպքերուն մասին, հտ. Ա., թարգմ.՝ Հմայեակ Ստեփանեանի, Պէյրութ–Լիբանան, 1960, էջ 163։

մար: Նույն օրը կես մետրից ավել ձյուն էր եկել եւ Բիթլիսից եկող զորքը, շուրջ 500 հոգի, նանապարհ բանալով գնում էր Դատվան: Մենք Սողոյի (խմբապետ Սողոմ հուշագրի հորեղբոր որդին էր, որը եղել էր ՀՅԴ նշանավոր գործիչ՝ Աշոտ Երկաթի զինակիցը, իսկ ավելի ուշ՝ Արամ Մանուկյանի թիկնապահը) գլխավորությամբ, 15 հոգի՝ զինված զանազան տեսակի զենքերով, մոտեցել էին նանապարհին եւ սպասում էին առիթի Վռամյանին ազատելու համար: Բայց Բիթլիսից եկող զորքի մի մասը սպասեց Կարմրաբեր կոչվող բարձունքի մոտ եւ հսկում էր շրջապատը: Նրանք ենթադրել էին, որ մենք շատ ուժ կունենանք եւ կովով կազատենք նրան: Ցերեկվա ժամը 11-ին մոտ Դատվանի կողմից զորքը հետ վերադարձավ, եկավ Կարմրաբերով անցավ: Նրանց անցնելուց հետո այնտեղ դիրք բռնած զորքը նրանց հետեւից նույնպես գնաց դեպի Բիթլիս: Մինչեւ մուրճն ընկնելը մենք մնացինք անշարժ մեր տեղում, գիշերը վերադարձանք գյուղ: Գյուղը չէր ֆնել եւ սպասում էր մեր վերադարձին: Գյուղի ժողովուրդը մինչ այդ էլ զգում էր իր օրհասական վիճակը, այս օրվանից նա համոզվեց, որ արդեն փրկություն չկա իրեն... Վռամյանին տարան Բիթլիս եւ սկզբնական շրջանում նրա վիճակից ոչ ոք տեղեկություն չունեւ: Հետո իմացանք, որ նրան Բիթլիսից դեպի Սղերդ տանող նանապարհին, Ծակֆար կոչվող վայրում կապել են ծառից եւ թնդանոթով խփել են: Սա ինձ պատմել է Բիթլիսի շրջանի Զվկան գյուղից Նշան Ասատրյանը»⁵⁰:

Վանի Առաջնորդական փոխանորդ Եզնիկ վրդ. Ներկարարյանը Իշխանի եւ Ա. Վռամյանի սպանությունն մասին հիշում է. «Գնացի կուսակալութեան պաշտօնատունը: Վանի թիւրք երեսփոխան Միւնիք էֆենդին ներսն էր. սպասեցի սպասման սրահի մէջ, մինչեւ դուրս եկաւ, եւ ներս մտայ կուսակալին մօտ: Զետեթը այլայլուած եւ շատ զայրագին դէմք ունէր եւ բռնորովին մենակ էր:

Հարցուցի. Լսե՛ր եմ, որ Դոմ Վռամենին ձերբակալել էք:

Ըսաւ. Այո՛, ճիշտ է:

Ըսի. Լսել եմ, որ Դոմ դրկել է Իշխանին իր ընկերներով եւ սպանել տուել էք:

Ըսաւ. Ճի՛շտ է, որովհետեւ Իշխանը, եթէ երթար Շատախ, փոխանակ խաղաղացնելու, պիտի աշխատէր հրահրել խառնակութիւնը, որովհետեւ եթէ այստեղի կօմիտէի հրահանգը չլինէր Շատախի ժողովուրդը Յովսէփի մը պատ-

⁵⁰ Հ. ԳՐԻԳՈՐՅԱՆ, *Հովակիմ Շահբազյանի «Դատվան» անտիպ հուշագրությունը, «Հայագիտություն հարցեր» հանդես, 2015 թ. թիվ 3 (6), էջ 58:*

նառով յարձակում չպիտի գործէին կառավարութեան վրայ եւ ոստիկաններ չպիտի սպանէին: Այս պատճառով ղրկեցի եւ Իշխանը սպաննել տուի: Մինչեւ անգամ հրամայեցի, որ եթէ կարելի չլինի փօլիս միտիրը անջատել, զայն ալ սպաննեն միասին:

Կուսակալի այս խօսքերէն սաստիկ զգացուեցայ եւ առանց ինձ հաշիւ տալու ըսի՝ Կառավարութեան մը մեծ ամօթանք է, որ մարդու դաւադրութեամբ սպաննել տայ: Դուք ղրկեցիք Իշխանը, եւ Դուք սպաննել տուիք:

Ըսաւ. Ո՛չ, ես չեմ ղրկած Իշխանը, ինքը գնաց: Երբ կերթար, ինձ ըսաւ, թէ՝ «Հագիր կերթամ, մի քանի արջ ալ կը զարնեմ»: Ես կոահեցի, որ փոխանակ արջի՝ քիւրտ պիտի սպաննէ:

Յետոյ սաստիկ կատաղած՝ աթոռին մէջ ցնցուեց եւ գոռաց.

– Թիւրք իմ օ դէվլէթին նամուսուն ու հէսիյէթին իգիմէ, քի բիգ շիմդիյէ կադար դյորթ «տղայա» եսիր օլմիշզ (թէլ եմ այն կառավարութեան պատուի ու նամուսի վրայ, որ մենք մինչեւ հիմա չորս տղայի գերի եղած ենք): Մենք ձեզմէ՝ կուգենք տասը հազար փախստական, իսկ դուք, մեզ խաղցնելով, կուտաք 70–80 հոգի: Բիլմիյորում, բունդան սոնրա բու մեմլեֆէթին իշինդ յա էրմենիլիք գալաջաֆ, յա իսլամլըֆ (Զգիտեմ, սրանից յետոյ այս պետութեան մէջ կա՛մ հայութիւնը պիտի մնայ, կա՛մ իսլամութիւնը): Վաղուրնէ սկսեալ թնդանօթներ քաշել պիտի տամ, որոնք որ յանձնուին, կը ներուին, իսկ չյանձնուողները տափսալաղ պիտի ընեն:

Ես ըսի, ափսոս, հազա՛ր ափսոս, կը ցաւիմ, որ կուսակալի մը բերնէն այսպիսի խօսքեր կը լսեմ: Մանաւանդ, որ Դուք հիմա դրացի պետութեան հետ պատերազմի մէջ էք: Վեց հարիւր տարի է, որ հայ ազգը օսմանեան պետութեան հաւատարիմ ընթացքի մէջ կը գտնուի:

– Զէմ գիտեր,– ըսաւ,– կա՛մ հայութիւն պիտի մնայ այս երկրին մէջ, կա՛մ իսլամութիւն»⁵¹:

Այն, որ Իշխանի, Ա. Վռամյանի եւ Վանի բազմահազար հայերի նահատակութեան հրամանը տվել էր Թ. Զեւղեթը, վկայում է ականատես – պաշտոնյա Մ. Էպլիղաթյանը, որը նշում է. «...այս մեծ ոճրագործը, քաղաքավար երիտասարդ ալպանացի մըն էր, խրոխտ եւ քաջ ապահովաբար... միեւնոյն ատեն հլու հնազանդ գործադրողն եղած էր իր պետերու հրահանգներուն»⁵²:

⁵¹ ՀԱՍ, ֆ. 227, ց. 1, գ. 453, թ. 4–5:

⁵² Մ. Էպլիղաթյան, *Կեանք մը ազգիս կեանքին մէջ. ականատեսի եւ մասնակցողի վկայութիւններ 1903–1923, Անթիլիաս, 1987, էջ 127:*

Գ. Պալաքյանը խոսելով Իշխանի եւ Ա. Վռամյանի սպանությունների մասին գրում է. «...Վանի կուսակալ Ճէլտէթ հայերու մէջ տակաւ խմորուող անձնապաշտպանութեան ոգին խեղդելու, եւ կենդրոնէն հրամայուած հայաջինջ ծրագիրը դիւրաւ գործադրել կարենալու համար, ըստ թրքական աւանդական սովորութեան, դաւադրութեամբ յանկարծ ձերբակալել կու տար Վանի մէջ Վռամեանը: Իսկ դիտումնաւոր կերպով Վանէն իբր թէ քննութեան եւ հանդարտեցնելու համար շրջակայ հայ գիւղերը դրկուած դաշնակցական յայտնի գործիչ Իշխանը, նոյնպէս նենգամտութեամբ գիշերով սպանել տալով ուղեկից ոստիկանապետին ու ոստիկան զինուորներուն ձեռամբ, կամայ ակամայ Վանի հայ ժողովուրդը ինքնին կը մղէր փոխադարձ անձնապաշտպանութեան արագ միջոցներու, կանխելու համար իրօքիհատակաւ կառավարութեան նենգամիտ հայաջինջ դաւադրութիւնը»⁵³:

Այն, որ Իշխանը եւ Ա. Վռամյանը զոր են գնում Թ. Զեւդեթի կազմակերպած դավադրությունը, դիտելի է նույնիսկ գերմանական ու թուրքական վկայություններից: Այսպես, գերմանացի քահանա Շտիրը նշում է, որ «ապրիլի 15-ին այնտեղ (խոսքը՝ Վանի մասին է.՝ Ա. Հ.) ուղեւորության ժամանակ սպանվեցին երկու հայ առաջնորդներ, որը նրանք ձեռնարկել էին վալիի կարգադրությամբ՝ թուրք ոստիկանների ուղեկցությամբ»⁵⁴:

Այդ է հաստատում նաեւ Մ. Թալեաթը, որը խոսելով դաշնակցական գործիչների սպանության մասին մատնանշում է, որ «...Դաշնակցութեան հրամանով եւ կուսակալ Ճէլտէթ պէյի արտօնութեամբ՝ Վանէն երկու ընկերներով նամբայ հանուած պարագլուխ «Իշխանը» նամբան սպանուած եւ երեսփոխան Վռամեանն ալ անհետացուած է: Թէեւ Ա. Մանուկեանն ալ մէջտեղէն վերցնել ուզուած է, սակայն Մանուկեան, աւելի նարպիկ գտնուելով, ապստամբած եւ կուսակալ ճէլտէթը փախուստի մատնելով»⁵⁵:

1915 թ. նոյեմբերի 15-ին Օսմանյան Թուրքիայի վարչապետ Սայիդ Հալիմը, անդրադարձ կատարելով օսմանյան խորհրդարանում հայ պատգամավորների բացակայության խնդրին, նշում էր, որ Վանի պատգա-

⁵³ Գ. Մ. ՎՐԳ. ՊԱԼԱՔԵԱՆ, Հայ գողգոթան. դրուագներ հայ մարտիրոսագրութենէն. Պեռլինէն դեպի Զոր, 1914–1920, հտ. Ա., Վիեննա, 1922, էջ 61:

⁵⁴ Հայերի ցեղասպանությունը Օսմանյան Թուրքիայում (1915–1918 թթ.). օտարերկրյա պետությունների դիվանագիտական փաստաթղթերի վկայությունները, փաստաթղթերի ժողովածու, կազմող, առաջաբանի հեղինակ՝ պատմական գիտությունների դոկտոր Լավրենտի Բարսեղյան, երկրորդ հատոր, Երեւան, 2011, էջ 161:

⁵⁵ Մ. ԹԻՖԱԹ, Օսմանեան ցեղափոխութեան մութ ծալքերը եւ իթթիհատի հայաջինջ ծրագիրները, Երեւան, 1990, էջ 93:

մավոր Վռամյան (Արշակ) էֆենդին Վանի ապստամբության ժամանակ Բիթլիսի մոտ սպանվել է⁵⁶։

Ա. Վռամյանի սպանության հարցը քննարկման առարկա է դարձել նաեւ օսմանյան խորհրդարանի հետպատերազմական շրջանի հայ պատգամավորների մեղադրական ելույթներում։ Սվազի երեսփոխան՝ Տիգրան Պարսամյանը օսմանյան խորհրդարանի 1918 թ. նոյեմբերի 18-ի նիստում հակաճառելով Մուշի թուրք երեսփոխան Իլյաս Սամիրի՝ Վանի հայերի դեմ ուղղված մեղադրական հայտարարություններին, ոգեկոչում էւ պաշտպանում է Ա. Վռամյանի «շինարար եւ ազգամուկ գործունեությունը»⁵⁷։

Օսմանյան խորհրդարանի հայազգի պատգամավորների, այդ թվում նաեւ՝ Ա. Վռամյանի սպանության հարցը քննարկման առարկա դարձավ նաեւ բրիտանական զինվորական դատարանում՝ Բեհբուս խան Զիվանշիրին սպանած Միսաք Թորլաքյանի դատավարության ժամանակ։ Ե. Օտյանին ուղղված փաստաբան Հ. Խոսրովյանի այն հարցին, թե օսմանյան խորհրդարանն իր հայազգի անդամների սպանության կապակցությամբ ցավակցություն հայտնե՞լ են, թե՞ ոչ, Ե. Օտյանը պատասխանում է. «Երեսփոխաններէն մէկը հարցապնդում ուղղեց եւ պատասխան ստացաւ որ մենա՞ծ են։ Ուէ՛ց ցաւակցական արտայայտութիւն չեղաւ»⁵⁸։

Ե. Գեղամյանը խոսելով Իշխանի եւ Ա. Վռամյանի սպանության շարժառիթների մասին համոզմունք է հայտնում, որ «պարզ չէ... այդ երկու գործիչների (խոսքը՝ Իշխանի եւ Ա. Վռամյանի մասին է.— Ա. Հ.) սպանման շարժառիթը»⁵⁹։ Հետ հեղինակի միգրացիոն թուրքական կառավարությունը նրանց սպանեց անվստահ լինելով նրանց անկեղծության վրա եւ զգուշանալով, որ նրանք շարունակելու են «հայ ժողովրդին գրգռել եւ լարել» թուրքերի դեմ⁶⁰։

Համանման կարծիք է հայտնում նաեւ Հ. արք. Նազլյանը։ Նրա համոզմամբ Թ. Զեւգեթը կարծում էր, որ «անհետացնելով գլխաւորները, պիտի կարենաւ դիւրաւ նուանել հայ ժողովրդեան մնացեալ մասը»⁶¹։

⁵⁶ Տէս Հ. ՂԱԶԱՐԵԱՆ, Ցեղասպան թուրքը, Պէյրուս, 1968, էջ 388–389։

⁵⁷ Վ. ՏԱՏՐԵԱՆ, Հայկական ցեղասպանությունը խորհրդարանային եւ պատմագիտական քննարկումներով. հայկական ցեղասպանությունը յետ-պատերազմեան օսմանեան խորհրդարանին մէջ, Բոստոն, 1995, էջ 44։

⁵⁸ Պէհպուտ խան Զիվանշիրի սպանիչ Միսաք Թորլաքեանի դատավարությունը անգլ. զինուորական ատեանին առջեւ, Աթէնք, 1936, էջ 107։

⁵⁹ Ե. ԱԻ. ՔԷՆՅ. ԳԵՂԱՄԵԱՆ, նշ. աշխ., էջ 611։

⁶⁰ Անդ, էջ 612։

⁶¹ Տրապիզոնի թեմին վիճակաւոր Յովհաննէս արք. Նազլեանի յուշերը Մերձաւոր Արեւելքի 1914–1928 շրջանի քաղաքական-կրօնական դէպքերուն մասին, հտ. Ա., թարգմ.

1915 թ. Ապրիլյան կռիվներից հետո Իշխանի եւ Ա. Վռամյանի նեխած եւ այլանդակված դիակները բերեցին Վան եւ համախումբ ժողովրդով հուղարկավորեցին դաշնակցության Վանի պանթեոնում՝ Արարուց եկեղեցու գերեզմանատանը⁶²:

Դ. ԻՇԽԱՆԻ ԵՒ Ա. ՎՌԱՄՅԱՆԻ ՍՊԱՆՈՒԹՅԱՆ

ԱՐՁԱԳԱՆՔՆԵՐԸ ԵՒ ՀԵՏԵՒԱՆՔՆԵՐԸ

Իշխանի եւ Ա. Վռամյանի ողբերգական նահատակումը իր խոր ազդեցությունը թողեց Վանի հետագա քաղաքական անցուղարձերի եւ մասնավորապես՝ 1915 թ. Ապրիլյան հերոսամարտի կազմակերպման գործընթացի արագացման վրա: Ժամանակին այսպիսի տեսակետ է հայտնել ռազմապատմական հանձնաժողովի նախագահ, ռուս զինվորական՝ կազակ, գեներալ-լեյտենանտ Ա. Կուլեբյակինը, որի համոզմամբ Իշխանի եւ Ա. Վռամյանի սպանությունները դարձան Վանի Ապրիլյան հերոսամարտի կայծը, որը վառեց ապստամբության բուռն կրակը⁶³:

Համանման կարծիք է արտահայտում նաեւ Օ. Մխիթարյանը, երբ գրում է, որ «...անոնցմէ մէկի անվերադարձ կորուստը եւ միւսի ստոյգ մահը եղան թերեւս ամենէն զօրաւոր մղիչ ու կազմակերպիչ ուժը Վանի երիտասարդութեան վիպական ու անձնուրաց հերոսամարտին: Մտաւորական առաջնորդ Վռամեանի ձերբակալումն ու յեղափոխական ռազմիկ Իշխանի մահը ցնցեցին բոլոր արի եւ երկշտ հոգիները եւ համոզեցին բոլորը ի միասին, որ այլեւ ուրիշ ճամբայ չկայ՝ բացի կռիւն ու ընդդիմութիւնը»⁶⁴:

Կուսակցական հայտնի գործիչների սպանությունը պատճառ դարձավ, որ «...Դաշնակցութիւնն ու Հայութիւնը Վասպուրականի մէջ ցնցուին մինչեւ իրենց էութեան խորունկ արմատները, այլեւս ընդմիշտ փակուած տեսնեն պատրանքի, յոյսի եւ զիջումի բոլոր ճամբաները, գան կեդրոնանան համերաշխութեան փրկարար գետնին վրայ, ապաւինին իրենց բազուկին ու հանճարին, զինուին Իշխանի վրէժով եւ զայրոյթով եւ մահը որոնելով անմահութեան մէջ՝ կերտեն Վասպուրականի Ապրիլեան Գոյամարտը»⁶⁵:

Հմայեակ Ստեփանեանի, էջ 163:

⁶² Տէս Հ. ՊԱՌՊԻ, նշ. աշխ., էջ 81:

⁶³ Տէս ՀԱԱ, ֆ. 1267, ց. 1, գ. 6, թ. 1–18:

⁶⁴ Օ. ՄԽԻԹԱՐԵԱՆ, նշ. աշխ., էջ 43–44:

⁶⁵ Յուշապատում Հ. Յ. Դաշնակցութեան 1890–1950, Բոստոն, 1950, էջ 477:

Իսկ Ն. Թեշտիմալճյանը նկատում է, որ Իշխանի ձերբակալությունից հետո «Վանի հայությունը վերահաս վտանգը տեսնելով, արագօրէն ինքնապաշտպանությունը կը կազմակերպէ եւ իր ունեցած աղփատ զինապահեստով թուրք-ֆուրս հորդաներու դէմ մահ ու կենաց պայքար կը մղէ»⁶⁶։

Բանն այն էր, որ Իշխանը եւ Ա. Վռամյանը Վանի նահանգի հայ բնակչության շրջանում մեծ ժողովրդականություն վայելող գործիչներից էին։ Սկսած համիդյան շրջանից Իշխանը երկար տարիներ եղել էր Շատախի, Գավաշի եւ Կարկառի շրջանների հեղափոխական հրահանգիչ եւ ղեկավար։ Մարմնավորելով Վանի դաշնակցության ռազմական ողջ հզորությունը, նա միակ գործիչն էր, որ կարողանում էր կապ պահպանել բոլոր խավերի հետ եւ մուտք գործել իթթիհատական ակումբներ⁶⁷։ Նա աչքի էր ընկնում իր մարտական կեցվածքով, ազդեցիկությամբ, որոշումներ կայացնելու ժամանակ անսաստելի էր, իսկ պայքարի ժամանակ անողորմ։ Իշխանն իրավամբ տաղանդավոր կազմակերպիչ էր եւ հանդուգն, անվախ ու անվիճարկելի առաջնորդ։ Նրա մասին Արամն իր հիշողություններում ներկայացնում է հետաքրքիր մի օրինակ. «Աղթամարի դպրոցի ամավերջին ֆննութեան ատեն, Հայոց պատմութեան դասի ժամանակ, երբ կհարցնեն, թէ հայերը այժմ թագաւոր ունի՞ն, պատասխանը կըլլայ «այո՛», երբ կը հարցնեն ո՞վ է - պատասխան կըլլայ Իշխան»⁶⁸։ Այդ առումով նա ամենավտանգավոր մարդն էր կառավարության համար։

Ինչ վերաբերում էր Ա. Վռամյանին, ապա նա հանդիսանում էր առաջին կարգի հասարակական գործիչ, որն աչքի էր ընկնում իշխանությունների հետ իր անմիջական հարաբերություններով, որոշումներ կայացնելիս կտրուկ էր, խիստ էր քննադատությունների մեջ, անվերապահ էր եւ անկաշկանդ⁶⁹։ Նա անխոնջ հեղափոխական էր, որը վաղուց հրաժարվել էր իր անձնական հետաքրքրություններից եւ ամբողջությամբ նվերվել էր կուսակցական աշխատանքին⁷⁰։

⁶⁶ Ն. ԹԵՇՏԻՄԱԼՃԵԱՆ, Հայկական ցեղասպանությունը եւ պատմությունը նենգափոխողները, Պէյրուիթ, 1996, էջ 29։

⁶⁷ ՏԵՍ Վ. ՓԱՓԱՋԵԱՆ, նշ. աշխ., էջ 21։

⁶⁸ «Աշխատանք», Վան, 1915 թ., յունիսի 6, թիւ 22–221, էջ 7։

⁶⁹ Նրա մասին Ե. Օտյանը նշում է. «Ազգային ժողովը Վռամեանի համար պատերազմի դաշտ մըն է, ուր պէտք է խոսքի ռազմամթերքով զինուած գալ»։ ՏԵՍ Ե. ՕՏԵԱՆ, Մեր երեսփոխանները, մեր ազգային ժողովը (36 լուսանկարով եւ 34 ծաղրանկարով), աշխատասիրութեամբ Գէորգ Տէր-Վարդանեանի, Երեւան, 1999, էջ 146։

⁷⁰ ՏԵՍ Оборона Вана, 7 апреля – 4 мая 1915 г., էջ 24։

